

Inoqarfiit sorliit aqqusinermik atassuserneqarnissamut periarfissagissaarnersut pillugit apeqquteqaat aallaavigalugu Inatsisartut oqallinnissaannik siunnersuut.

(Inatsisartuni ilaasortaq Aqqa Samuelson, Inuit Ataqatigiit)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Naalakkersuisuniit Inatsisartuni ilaasortaq Aqqa Samuelson, Inuit Ataqatigiit, apeqquteqaat aallaavigalugu oqallinnissamut siunnersuuteqarneranut qutsavigaarput.

Aqqusinernik sanaartornerup soqutigineqarluarnera tusaasinnaagatsigu Naalakkersuisuniit nuannaarutigaarput. Angallannermut attaveqaatinik, inuiaqatigiit pisariaqartitaannut pitsaanerpaanut sapinngisamillu akikinnerpaanut matussusiisinnasunik pisariaqartitsivugut. Taamaalilluni aqqusernit assartuussinissamut pisariaqartitat taakku matussusersinnaavaat.

Aqqusinernik sanaartorneq immikkoortoq 32, Inatsisartut upernaakkut ataatsimiinneranni, aqquserngit sanaartornissaat siunertaralugu ataatsimut aqqissuussamillu ilisimasanik katersuiviliornissamut kiisalu suliassaqaarfimmi kommunit suliniutaannut tapersersuinissamut Naalakkersuisut peqquneqarnissaannik Inatsisartut aalajangiiffigisassaattut siunnersuummut tunngasup, Hermann Berthelsen-imit saqqummiunneqartoq oqallisigineqarpoq. Inatsisartut aalajangerput, Naalakkersuisut pisussaatinneqassasut ”qulakkiissallugu, Namminersorlutik Oqartussat ataanni kommunit oqaloqatiginerisigut; aqquserngit sanaartornissaat siunertaralugu ataatsimut aqqissuussamillu ilisimasanik katersuiviulissasoq taamaaliornikkut, nunami attaveqaqatigiinnerup aqqissugaanera tamarmi ataatsimut ataqatigiissaarneqassasoq pitsaanerpaamillu maannakkut atuuttunik siunissamilu immikkoortunut pilersaarutitut naapertuuttunik.”

Taamaattumik assartuussinermut pilersaarut, aammattaaq aqqusinernik ilaatitsiviususaaq Naalakkersuisut aallartippaat. Naalakkersuisut 2020-mut aningaasanut inatsimmi aningaasanik aqqusinernut immikkoortitsisoqarnissaa apeqqutaatillugu, aqqusinernut immikkoortortamik pilersitsinissaq sulissutigaat.

Aqqusinernik sanaartorneq immikkoortillugu isiginiarneqarsinnaanngilaq. Aqqusinerni ilaasunik nassatanillu assartuussinermut saniatigut aamma mernguarnissaq siunertarineqartarpoq, tamatumalu peqatigisaanik nunap timaanik ammaanissaq aammalu illoqarfinnik najugaqarfinnillu ineriartortitsinissaq periarfissinneqartarluni.

Ataatsimut isigalugu aqquserniornissaq qinigassatut allatut inuiaqatigiinnut naleqarnerpaappat aqquserniussaagut. Taamaattumik illoqarfinnik takornariaqarnermillu ineriartortitsinerup saniatigut aqqusinernik sanaartornerit mittarfeqarfinnik, mittarfinnik, qulimiguulinnik mittarfinnik kiffartuussinissamullu isumaqatigiissutinik suliaqarnermut atasutut isigineqassapput.

Inuiaqatigiit aningaasaataat killeqarput. Taamaattumik najugaqarfiit marluk akornanni aqquserniornermi qulimiguullit immakkulluunniit angallatit atorlugit sullinneqarnissamut pisariaqartitsisoqarunnaarsinnaavoq, kisiannili lastbiilit bussinillu ingerlatsinerit pisariaqartinneqalersinnaallutik. Aamma aqqusernit ingerlannerinut aserfallatsaaliornerinullu aningaasartuutit eqqarsaatigineqartariaqarput. Aqqusernit bussillu nalinginnaasumik kommunit akisussaaffigineqartarput. Taamaattumik tamatumunnga atatillugu aamma najugaqarfiit akornanni aqqusinertigut ilaasunik angallassinermi akisussaaffiit agguarneqarnissaat misissussallugu pisariaqartussaavoq.

Siunnersuutip aqqusernit takornariat pinngortitamik takunninnissaannut aqquassatut isigai. Assersuutigalugu siunnersuuteqartoq oqarpoq, ”takornarissat pisuinnaat nalorninaatsumik takuneqarsinnaasunngorlugu ingerlavigineqarsinnaasunngorlugulu aqquataat namminneq atuarlugu inoqarfimmiit inoqarfimmut aqquutigisinnaajumaassavaat”. Taanna pisuinnaat aqquataannut pitsaasumik nalunaarsukkamut nassuiaataavoq. Pisuinnaat aqquataat nalunaarsorluakkat aamma takornarianut iluaqutaasinnaammata, aqquserniassanullu piareersaatasinnaammata Naalakkersuisut isumaqataapput. Tamanna ineriartornerussaag nalinginnaalluinnartoq.

Taamatut oqaaseqarlunga Inatsisartut oqallilluarnissaannut kissaappakka.